

黃虞部鼎珮詩集

葉恭綽題

凡例

一、本集因存稿太少而親友鈔來之稿又間有涉於疑似未敢攔入因此遷延未克付印今重以親友之督促及爲保留先人手澤起見遽以付梓雖篇幅簡少在所不計

一、各稿作自何時作於何地不可考訂姑從簡略

一、秋日山行有句未免多情差近佛不辭好勝爲看山重見於自歎一首大抵生平得意之句與至未留意特存其真

一、本集專爲保存先人手澤起見非以問世閱者諒之

廣州大學圖書館代贈

愛吾廬詩存

台山黃榮熙鼎珊遺著

男毅芸編纂

卅七年五月
於廣州大學

短歌行

百年三萬六千日隙中駒與電爭疾舉盃欲飲蒼天高煙雲過
眼翻波濤四顧茫茫風惻惻人海升沈說不得樹頭有花開有
時拔劍斫地徒爾爲

長歌行

天高不可階地迴不可縮側身天地間滄海渺一粟古人倏然
往來者復迫促彈指億萬年形骸等枯木辛苦求長生神仙未
免俗春華能幾時秋草萎以綠寒風一夕至蔚林變老禿四時

遞相嬗古今一轉軸味何必膏粱衣何必綺縠有生民以來寥
寥數芳躅萬世千秋後竹帛照人目君子思令名爲善日不足
書懷

久客竟何謂身閒思轉深澆花權雨露對畫愧山林鄉夢八千
里春暉一寸心風塵感雙鬢容易二毛侵

貧病年來事孤懷黯不勝狂歌聞白社長物只青燈交有忘機
客情如退院僧五陵裘馬地何用骨峻嶒

燕歌行

白日欲沒風颼颼塞雲關樹相與秋丈夫氣如鷹脫韝高舉遑
計空閨愁十五盈盈處子樓黃金絡臂玉搔頭顧盼光彩羣花

羞習禮明詩溫且柔大地無情生九州山高水遠心悠悠欲往
從之艱阻修涼颼蕭颼憐衿裯中庭蟲語聲啾啾忍擲光景隨
西流問君客路何時休妾情脈脈空夷猶

吳趨行

浮雲變世態岸谷忽然殊四座且勿喧聽我歌吳趨泰伯著端
委季子勵廉隅聲華與文物廓然開上都川澤俱沃衍襟江而
帶湖地靈與人傑積厚氣旁敷世傳二十五蔚爲霸王圖雲館
互跨峙響屨廊何紆越師一夕至麋鹿游姑蘇塵影揚滄海興
廢無代無今日又慘目無乃類沼吳名區嗟零落所重求牧芻
起衰者誰屬嗚呼經濟儒

七夕拜織女星書郭汾陽傳後

長生殿前語未畢曳落河向漁陽溢天下安危七尺身異姓真
王傑然出我聞銀州七夕時空中天女來遲遲曰大富貴亦壽
考吉語先爲公祝之福星度世不可抑縲紲之中識者識人倚
道濟當長城天生西平爲社稷雨淋鈴夜替戾岡憑陵畿甸紛
豺狼手提虎旅走魑魅叱咤風雲日月光桀黠搆扇動河朔重
結犬羊爲犄犄葉公免冑破空來臚拜胡兒若崩角卅載戎旃
臣匪躬命宮磨蝎仇英雄奉尺一詔如追風彼婦之口徒內訌
東山歸來有絲竹養晦韜光受其福天闕朝回笏滿床人自擾
擾公堂堂二十四考中書令嗚呼神識非荒唐胡爲約誓辜妃

子默禱乃眷汾陽王碧漢迢迢此何夕後視今猶今視昔玉露
金風秋氣高雲駟繡幄渺無迹竭來大地生煙塵安內攘外應
有人我要披雲問織女如令公者在何許

火輪航海赴都

直鼓雙輪越渺濛奇情勝概一時雄觀瀾真是難爲水破浪從
今不借風元氣渾涵三島外諸天搖盪九州空望洋向若緣何
數尙覺元虛賦未工

水仙花

似比寒梅得氣多不煩寸土也婆娑瓣香曾教三閭祝花惱閒
吟一笑和湘水渺茫誰鼓瑟洛川丰格此凌波山礬未必難爲

第能否吹簫唱渡河

赴都和李梅珊贈行用原韻

談詩縱酒舊情文唱到陽關別緒紛攬轡我會憐孟博請纓人
或笑終軍優游畢竟田園好臭味休將出處分拜和一章情萬
疊更留他日賦停雲

次和馮斗南贈行之作並呈劉比部鸞坡同年

城市偶隨麋鹿遊論文縱酒幾淹留男兒例有四方志少婦今
輕萬戶侯湖海性情私自笑尊鱸風味况當秋關心一曲陽關
笛別緒依依苦莫酬

磊落時思物外遊未能免俗此勾留歸來詞愛讀彭澤天下事

難困鄴侯石徑新詩紅樹晚塞沙寒色白雲秋惟餘一事須惆
悵陽羨買田志未酬

軟紅塵裏並車遊酒畔花前任去留自古勳名關運會幾人物
色到公侯鯨鯢得勢能吹浪鷹隼聞風易感秋極目雲山天萬
里平生壯志幾時酬

有誰真作橘中遊却厭風塵不少留但得曠懷觀宇宙何勞抵
掌對王侯馮唐屈志青年日劉向傳經白髮秋呼飲忽忽臨別
處莫辭醉後更相酬

京回舟過蘇州

闔閭城外片帆收一水清漣寂寞流萬里煙塵還遠客滿天風

雨入孤舟驚心岸谷憑誰說到耳
笙歌悵昔遊漫說吳宮舊花
草零磚斷瓦不勝秋

憶荔支

猜詳鄉果綴深叢銀杏櫻桃未許同
密葉定含新雨綠香塵應
透夕陽紅劈來尙記千苞滑
啖去今誰百顆充清味較他
蓴菜
好思歸何止爲秋風

題地輿圖

赤縣圖從尺幅看一廬真抵萬重寬
長安有路何曾遠蜀道如
天未是難如此江山超象外儘餘世界任鵬搏
堯封禹蹟終無恙只仗奇才爲奠安

由天津航海

年來跌宕氣難磨又涉蒼茫萬頃波
烟渚潮回人語靜海門風急浪花多
未忘豪氣時呼酒要遣閒愁一放歌
萬里雲帆原快事只憐道路尙干戈

花 韻

蝶板鶯簧寫太和小闌晝靜雨初過
色香有譜徒云爾絲竹開筵奈俗何
絕代風流憑意會撩人氣味得春多
懽然相對渾無語莫聽吳儂懊惱歌

詠 史

萬里侯封班定遠中書令屬郭汾陽
英雄位置原非偶雷雨經

綸視所長異采每從雲脚現好花終到樹頭香談兵莫笑對樽俎琴劍蹉跎老更狂

紛紛傀儡幾何年真氣難磨別有權方朔談諧憑點綴鄴侯丰格本神仙縫城功竟歸之武蹈海人誰識仲連漫把杞憂論時局總餘一柱爲擎天

贈別

幹濟才宜有印官秋風旋動遠遊冠關心夜燭人情幻過眼浮雲世態看拙宦自憑天作主高吟權借酒爲壇忽忽一別算何事鄭重同加努力餐

德州道中早行

霜月滿天白衝寒客載奔輪蹄催短夢馬褥惜餘溫沙遠都疑
水煙深不辨村歸程敢辭苦經歲缺晨昏

津門感事

一望津門便慨然逆夷曾此犯嚴邊重關轉折來番舶故壘荒
涼起暮煙五利共知師魏絳百年無待泣伊川包含亦是昇平
事但要諸酋解畏天

夜入值同達小泉作

半窗紅影對長檠禁漏迢迢徹鳳城上界月明雙闕迴虛堂人
靜一官清昂頭天地心何着拊髀英雄肉易生儘謝君能同磊
落不辭茶話到天明

生日在都門作

素衣憔悴感風塵，況是天涯初度晨。
三十六年嗟過客，八千餘里滯閒身。
功名自領鷄肋味，歲月重驚馬齒新。
遙憶家筵團聚處，多應懸揣遠遊人。

對月書懷

禁鼓樓頭漏幾更，山林朝市兩關情。
雲飛錦里連天遠，月近蓬壺特地清。
經濟自須酌竹帛，英雄原不在科名。
煙塵滿目千何事，帳觸荒鷄五夜聲。

白蓮花

孤影亭亭漾碧漪，采蓮人漫鬥胭脂。
光分露蓋珠千斛，香動風

亭月一池瓊島夢回空別豔水仙開後此奇姿淤泥濯淖鉛華
淨始信平生涅不緇

讀金文毅公論黔兵疏

苦寇何堪更苦兵先生抗疏費經營危言漫詫陳同甫浩氣平
吞馬士英但保里閭遑避怨本來忠孝舊知名可憐訓練垂成
日無事趨朝一請纓

讀諸葛忠武志

大儒經濟大臣風三代而還僅見公爲有奇才偏謹慎卽觀遺
事亦英雄前軍倘未驚星落漢室終當計日隆帝胄一稱名義
定早持正統草廬中

赴都與羣從話別

放眼乾坤一按鞍分飛雁影不勝寒
思量異日團圓少惆悵孤雲去住難
此別最憐花爛熳前途慰語竹平安
儒生報國知何似莫作封侯骨相看

感事

落落中年意氣驪側身天地此踟躕
才堪經世談何易事到求人計已迂
未惜十千供醕酎頗能百萬擲樗蒲
鵬鵬祇仗搏風翼問借人間寸力無

長歎

罡風吹海湧狂瀾怪事紛傳劍胆寒
得水餘鯢猖獗甚鳴狐篝

火湔除難召戎自古悲童貫縱鵠何人是曲端回首觚稜倍悵
觸拊膺長歎誤儒冠

月中桂

世間開落任紛紛別有天香透紫雲可是霓裳同詠日步蟾人
許一枝分

西湖返棹圖

獵獵歸舟一葉輕羅江東是舊時名鷄蟲得失成何事坐愧英
雄髀肉生

放鶴亭前鶴已飛望湖樓外澹斜暉多情最是揚州月來伴高
人一棹歸